

Zyamadaimona

Cilao Cakunyama



Lino Ndi...?...Kabeela katakwecintu aa teepu—Mul.] Eci nciindi citaanzi Nce kasola kucicita mu miswaangano yangu ili yoonse kuzwida Ne kali mu mulimo. Eci nciindi cipya. Mukwesu Baxter wakaunka; alimwi—alimwi Mukwesu Bosworth uli mu India, na, Africa; elyo Mukwesu Baxter, Nse zyi oko nkwa bede. Wa kaunka kubusena bumwi, abamwi babo tabako bakaunka. Elyo Billy a Mebo tuli okuno tolikke, aboobo tujisi buyo ciindi cipati: kunyamuka buyo, kujaya a kulya. Aboobo, tu—tu baanga tulimvwa mbuli kuti ambweni tula konzya, ku lugwasyo lwa Mwami, tula konzya kuzumanana ncobeni a muswaangano cakuzwidilila, lwesu. Nke kaambo Nce kondedwe kuubona kucinca aniini, ku kaambo ako komwe. Nda syoma Mwami uyo tugwasya ku cicita. [Mbunga yaamba, “Ameni.”—Mul.] Lino, nywebo mulizi kuli . . .

Nda botelwa bweendelezi bwangu. Ndi jisi bakwesu bamwi bayandisi, Bosworth, Baxter, Lindsay, Moore, boonse, jisi bosanwe babo, Baron von Blomberg. Balo mbantu babotu maningi ncobeni. Pele kuli buyo cintucimwi kujatikizya, cindi wabikka nkamu ya bantu antoomwe, omwe ujisi cintu comwe, omwe ujisi cimbi. Ciindicimwi eco ciliimpene kuli ceeco Nce yeeya lwangu. Aboobo Ndi—Ndi—Ndi limvwa kubaanga Ndila angulukide lino. Tula konzya kuba buyo a ciindi cipati, kupeta buyo maboko esu aamashaati, a kutalika a kulya canguzu. Ndi yeeya kujatikizya kupeta maboko anu aamashaati akuba aa—aa ciindi cipati.

Bbaibbele lyangu taanzi bwakali bulenge. Nda kaiya Leza kwiinda mu bulenge. Alimwi Nda yandisya kuzela nswi. Obo Mbwe kuyandisya kuzela nswi! Ayebo ula yandisya kuzela nswi, mulombe daala? Ikuti ula yandisya kuzela nswi, a kubayanda banyoko, uyooba mulombe mubotu. Elyo nokuba kusanduka kwangu tii kwa kakugusya konse kuzwa muli ndime. Aboobo buzuba bumwi Nda kali kutala mu malundu, kuya buzela nswi kule. Lino, oku nku bubotu buyo bwa mulombe muniini. Elyo Nda kali kuzela nswi kutala okuya mu malundu . . . A ku bana bambi baniini, mubwini, bakkede mumabali. Elyo Nda kali kuzela tutaka. Elyo, oh, ncibutuloko mu ciindi cabutololo. Nda zwidilila mbuli obuya, elyo kwakali tutaka buyo mu mpako yakali kutobela, nywebo mulizi, mbuli boobo. Elyo kulumbaizya buyo Mwami akuba aciindi cipati, koongolola. Ziindizimwi, kulosya kalobo kangu ansi. Ndi syoma mu koongolola. Ameni.

Nda cita ncobeni. Nkaambo, Ndi lizi cintucimwi cila ndijata, alimwi cicita buyo cintucimwi kuli ndime.

² Aboobo Nda kaluunkide kukubwene cifumo eco, elyo cindi Ne kajokela, cintu ceenzu loko: Kuli bamasekese banji mu cisi kutala okuya, mu New Hampshire. Ndi jisi cilabba ciniini kutala okuya, oko Nkwe zelela nswi. Nda kajisi tente liniini lya kaindi kali yakidwe, tente liniini lyakaindi Mwe kali ku kkalilamo. Elyo masekese usiya nce cintu ciinda kusunda ciliko. Aboobo, masekese mutumbu mukulukulu a twana tusyooonto baka njila mukati omuya, elyo bakali mwayaula tente lyangu!

³ Lino, ino muyeeya nzi Nce keelede ku cita kuli masekese ulya, musimbi muniini kusule okuya wa masusu ayo aasubila, kusule okuya? Nda keelede kumutobezya ncobeni, Nse keelede na?

⁴ Pele nceeci nca kacita. Waa kanjila, waa kazapaula tente lyangu akutataula zintuzyonse, a kulya zilyo zyangu zyoonse Nze kajisi omuya, alimwi waa kali kupona buyo kabotu. Aboobo cindi Ne kasika, ngooyo waa kaunka. Elyo waa kwiilila twana twakwe, nkabela kana komwe kaniini kakazuza a nguwe. Elyo kamwi tika kazuza; ka kakkala buyo awo. Kaka ndipeda sule, mbuli boobu, alimwi kakali kucita cintucimwi. Elyo Nse ka jisi cintu mu janza lyangu pele buyo keembe kaniini kaku janza kakaindi. Nda kali kuuma koonse a bapati bamwi kunselelo okuya. Ee, waa kazuza mbuli kutandila kule mbuli, oh, Nda yeeyela okuya ku poolo lya telefoni okuya, elyo waa kakkala ansi. Waa ka kwiilila masekese oyu muniini wakaindi, elyo taka bikkila maanu kuli nkuko pe. Wa kazumanana buyo kukkala awo.

⁵ Nda kayeeya, “Ino ulya mulombwana muniini ucita nzi?” Nda keenda muni aniini. Nda kali yoowede kuswena muni maningi, kuyoowa kuti waa kalino ndikwalaula. Aboobo—aboobo Nse—Nse kali kukonzya kubona cisamu, alimwi Ndi lizi waa kali kukonzya kutanta awalo. Aboobo, elyo Nse kali kuyanda kuswena muni maningi kuli nguwe, nkaambo Ndili buzi bulenge bwa masekese. Aboobo, Nda kaunka buyo muni aniini. Elyo mulizi caka citika na?

⁶ Lino, Nda yandisya mapanikkekke. Mbangaye banu balombe bayandisya mapanikkekke? Oh, mulombe! Oh, Ndi. . . Balombe bapati, abalo. Nda babona kutambika maanza abo. Toonse tula yandisya mapanikkekke, alimwi Ndila ayanda nconzyo, alimwi Nda yandisya kutila buci ali ngawo. Kuba muna Baptisti, nywebo mulizi, eco nce cintu lulamika, nywebo mulizi, bwalo mbuci, nywebo mulizi. Aboobo, elyo amuswiilile, Nse asansaili pe, Nda bapatizya ncobeni. Ndi butila ncobeni awo mpobuli bubotu ncobeni a kulema. Nse sansaili buyo aniini awa a waawo. Ndi butila ncobeni ali ngawo, kwaazuza oonse kubelesya buci.

7 Elyo mpawo, nywebo mulizi, Nda kajisi bbaketi ya buci omuya, cisela ca bbaketi lya galoni ilya buci. Elyo bamasekese bala bubotelwa buci maningi. Aboobo oyu mulombwana muniini waka njila omuya aku vununa tampa kuzwa ku bbaketi elyo lya buci, alimwi wa kali kkede awo mbuli boobu, a bbaketi eli liniini lya buci kungsi lya kuboko kwakwe, mbuli *boobu*. Wa kabweza i. . . Elyo takazi mbo buligwa, mbuli mbomu konzya, nywebo mulizi, aboobo wa katesya buyo cituta cakwe mukati aku cimyaankuta mbuli *boobo*, aku cimyaankuta. Elyo waka vuuluka kulanga kuli ndime, elyo meso akwe maniini akaindi onse akali vumbidwe antoomwe, ida lyakwe liniini lyakali kabotu mbuli mbo lyakali kukonzya kuba, a buci. Wa kali kkede buyo awo, kabikkide kwaanza kwakwe ansi a ku myaankuta buci, mbuli *boobo*, canguzu buyo mbuli mbwa kali kukonzya kumyaankuta.

8 Oh, ma, Nda kayeeya kujatikizya muswaangano mubotu wa ciindi cakaindi iwa Muuya Uusalala, cindi twa jula buyo bbaketi, ku dyobokeya maanza esu mu cijaaki aku myaankuta. Kuzumanana buyo, nywebo mulizi, kumyaankuta buyo.

9 Elyo sena mulizi cintu cisesya mboca kabede, nokuba? Naakamana mulombwana oyo muniini nakalya kunji mbuli nkwaakali kukonzya, wa kalosya bbaketi a ku zuzila okuya. Mulizi na caka citika? I mutumbu masekese a masekese umwi muniini baka talika ku mu myaankuta, kutegwa bagusye buci.

10 Aboobo, ee, ambweni muswaangano wesu uyooba cintucimwi mu bweende obo, Mbwe langila, kutegwa tuzumanane kwaambila bamwi, a bulemu bwa Leza kabuwida ali ndiswe. Yaa.

11 Ndili kondedwe ku mubona nobana baniini. Nda yandisya ku mwaambila cintucimwi mbuli ceeco. Elyo ambweni juunza masikati, tu kabe aciindi cinji, elyo—elyo tuyo konzya kwaambaula kunji aniini. Elyo tuyo kanana kuli taata a baama lino kujatikizya cintucimwi.

12 Tuyo kanana aali *Zyamadaimona*. Mu Ntembauzyo 103:1 kusika ku 3, tula bala tumpango otu. Kanji mukutausi onse a mupaizi, na mubali wa Bbaibbele, uli tuzi mu moyo.

Kolumba MWAMI, O muuya wangu: a zyonse zili mukati kangu, zilumbe zina lyakwe lisalala.

Kolumba MWAMI, O muuya wangu, alimwi utalubi zyoowe zyakwe zyoonse:

Nguwe ukulekelela nsendami zyako zyoonse; nguwe uponya malwazi ako onse;

13 Ndi yanda kuti mubone awo, kwakali “zyoonse.” “Nguwe ulekelela nsendami zyako zyoonse, Nguwe uponya malwazi ako onse.” Lino inga twa kotamika mitwe yesu aniini buyo.

14 Lino, Taata Wakujulu, twa Ku lumba masikati aya, ku kuba okuno. Twa Ku lumba ku bana aba baniini bakkede awa oonse,

balo mbaalumi ba juunza, a banakazi, ikuti na kunooli juunza, ikuti na Jesu katanasika. Elyo lino, Taata, twa komba kuti—kuti Uyo tulongezya lino mbuli mbo tu kanana lino aa Ijwi Lyako, a kujatikizya sinkondo mupati ngo tu jisi, Saatani. Twa komba, Leza, kuti Uyo tulekela kubikka bbuwa lyalumamba, cintu ca muncini awa, nguzu zya Leza, ezyo ziyo muzunda sunumasiku mu inchi lyonse lya matomeno aakwe, Mwami, aku mutondezya kuti ta jisi nguzu zya mulao pe, cakuti Kristo waka muzunda mu busena bwesu alya a Kalivari, cindi Na kafwa, elyo Wa kasaala bami a kunyanga Saatani zyonse—zyonse nguzu nzya ka jisi. Elyo, Leza, tupe busongo a kumvwisya lino, ku kuziba a kupandulula ku bantu obo kuti bazibe obo mbo bakonzya kuponesegwa a kuzunda Saatani. Mu Zina lya Jesu twa paila. Amenii.

¹⁵ Lino kwa maminiti maniiini tuyo kanana aali *Zyamadaimona*. Mula mvwa kunji loko kwa madaimona. Lino, juunza masikati ambweni tuyo manizya. Ndali kuyanda mazuba obilo aa mvwiki eyi, akwalo, kukambauka ali ceeci, buyo. . . na mazuba obilo ku kuswaangana kwa masikati, kwaambaula ali ceeci.

¹⁶ Lino, cintu citaanzi, nzila daimona mbolibede. Mula mvwa bantu banji loko kwaambaula kujatikizya daimona. Ee, lino, ii “daimona, dyabulosi,” onse azwa ku bbala lyomwe, elyo mu Chikuwa liitwa kuti “sikupenzya.” Ii mulombwana oyo upenzya ngu dyabulosi, umwi mubi. Wa amba kuti. . . Lino, Bbaibbele sunu, ku banji, ku bantu banji, ndi bbuku limwi lyakaindi elyo syaanene a banene ndyo bakabala, na cintucimwi mbuli boobo. “Takukwe kunji kuli ndilyo, ndya bantu bakale, abamwi bambi.” Pele eco cili lubide. Ndyo muntuonse. Alimwi madaimona mbaasikupenzya abo batupenzya.

¹⁷ Lino, kuli madaimona ayo aboola mu buntu bwa muntu, elyo oko nku, munnzila ya mabala a bwaambe, eco inga caba—eco inga caba mu. . . Inga ndaamba ceeci, nokuba, daimona eelyo liboola mu buntu ncintucimwi eco cipenzya buntu.

¹⁸ Ziindi zinji mula konzya kubona bantu ambweni ba busondosi. Lino, inga ambweni kabali bantu basandukide, bazwide Muuya Uusalala, elyo nokuba kasondokede ncobeni. Mwabona? Mbo mbubo. Eco tacikwe cintu cakucita ku buntu. Ngu sikupenzya, mwabona, cintucimwi eco cibapenzya.

¹⁹ Lino, kuciswa koonse, twe elede kuziba lutaanzi kuti kuciswa koonse kuzwa kuli dyabulosi. Leza tali mukamwini wa kuciswa. Taakwe kuciswa kuzwa kuli Leza. Leza ziindizimwi ulazumizya Saatani kubikka kuciswa ali nduwe, mbuli muluso wa kukujosya ku ng’anda ya Leza, cindi nota swiilila. Pele kuciswa, ku matalikilo aa nkuko, kuzwa kuli dyabulosi. Sa inga mwayeeyela kuti muntu ulakonzya ku syoma kuti Leza, Taata wesu Wakujulu, inga waba mukamwini wa cintu cili

boobo mbuli bulwazi a lufu? Ee, peepe, tali Nguwe, tacina bede, ta kukabi. Leza ulazumizya lufu nkaambo kakuta swiilila. Leza ulazumizya lufu. Mbuli mulembi umwi mbwa kaamba, “Koonse oko lufu nkolu konzya kucita, Leza waka lutambisya ku cikocikala nkabela lutu kwelela mu Busyu bwa Leza, musyomi.” Pele bbala *lufu* lyaamba, “kwandaana.”

²⁰ Jesu wakati, “Oyo umvwa Majwi Aangu a ku syoma Oyo waka Ndi tuma, ujisi Buumi butamani.” Alimwi Wa kati, “Ndime bubuke, Buumi, oyo usyoma muli Ndime, nokuba kuti wakali fwide, uyo pona, alimwi kufumbwa oyo uupona a kusyoma muli Ndime tako oyofwa.” Elyo tula bweza mibili ya umwi aumwi kuya ku cuumbwe cesu citali ca basalali. “Pele tako oyofwa.”

²¹ Lino ikuti na muyo langilila cindi Na kaamba zya Lazaro, Wa kati, “Lazaro uloona.”

²² I basikwiiya, bantu mbuli mbo tubede, ba kati, “Oh, ikuti na uloona ucita kabotu.” “Wa kali kwaamba kulyookezya,” eco ncoba kayeeya.

²³ Pele Wa kaboola a kwaambaula kuli mbabo mu cisyobo cabo. Wa kati, “‘Uli fwide,’ eco nco musyoma. Pele,” kati, “Nda unka nkamu busye, nkamu busye.” Mwabona? Mwabona? Cindi wa . . .

²⁴ *Lufu* caamba “kwandaanya.” Lino, ikuti na umwi wanu wacita, umwi wa mukwasyi wanu wafwa, na cintucimwi, ngu, ikuti na uli sandukide, taba fwide. Bali fwide mu nzila yakuyeeya kwabuntu. Pele ba kaandanisigwa buyo kuzwa kuli ndiswe, pele bali mu Busyu bwa Leza. Taba fwide, alimwi taba konzyi kufwa, tacikonzeki kuli mbabo kufwa. Jesu wa kati, “Oyo umvwa Majwi Aangu a ku syoma ali Oyo waka Ndi tuma ujisi Buumi butamani, alimwi taka booli mu lubeta, pele wainda kuzwa ku lufu kuyaku Buumi.” Aboobo, ta konzyi kufwa. Kufumbwa cintu citafwiki, Citamani, ta cikonzyi kuloba. Mbuumi butalobi. Uli Bu jisi nkaambo Leza waka Bupa kuli nguwe. Elyo kutali—kutali cabweelelo; nca i . . . Taakwe ayaaminwa. Leza ula Bupa kuli nguwe.

²⁵ Leza ulaita. Taakwe muntu ukonzya kuboola kuli Leza citakuti Leza waka mwiita. Jesu wakati, “Taakwe muntu ukonzya kuboola kuli Ndime cita Taata Wangu wa mwiita, wa mukwela.” Mbo mbubo na? Aboobo ngu Leza muli koonse. Ambweni juunza sikati tuyo bweza kunji aniini ali ceeco, nkaambo Ndi yanda kuleta cintu eci ca *bulwazi*, kuli ndinywe, kutegwa muka cibone eco.

²⁶ Kwakali ciindi nitwa kabambwa kuba nseke muli syaanene mupati. Nywebo mulizi eco. Dokotela ulizi obo. Ee, mula cita, a nywebo, nobabali ba Bbaibbele. Nywebo mulizi nseke ya buumi yaka talikila kuli syaanyookulu mupati, kuba nseke, akuzwa kwiinda kuli syaanyookulu, mpawo kuya muli bauso, mpawo kuli banyoko a waawo mpo bede lino. Mbo mbubo. Lugwalo

lula ciyiisya eco akwalo. Ndoolu Lugwalo kuli ndinywe ikuti na mula yanda. Nda syoma lwa kaamba kuti Levi wakapa zimanyakkumi naka cili mu cikungu ca Abrahamu, oyo wakali syaanyinakulu mupati. Mbo mbubo na? Aboobo, mwabona, nseke yakaba kaindi okuya.

²⁷ Pele buntu bwanu bwaka pangwa inyika kaitana lengwa, cindi Leza naka lenga muntu mu cinkozya Cakwe Mwini; muuya wa muntu; kutali *ii* muntu mu cinkozya Cakwe Mwini, pele *muntu* mu cinkozya Cakwe Mwini. Mwabona? Elyo mpawo Wa kabalenga mweenze a muzyazi, Ka tana kusola kuba a muntu kuzwa ku lusuko lwa nyika. Ni twa li jisi ciindi ceelede masikati aya, kuliiba a ku jokela muli ceeco. Kubona buyo obo Leza. . . Lino, cili akati ka muzila, pele, cindi mwabona, ciboola nkoonya kutala a muzila. Mwabona? Obo Leza, kaindi ku matalikilo, eco Nca kacita okuya, aboobo Mbwa kaselemukila aa nyika aboobo Mbwa kapanga muntu mu cinkozya Cakwe; elyo mpawo Leza waka cinca akupangwa mu cinkozya ca muntu, ku kunununa muntu.

²⁸ Lino, cindi Leza nakapanga muntu mu cinkozya Cakwe, wakali muntu wa muuya. Elyo mpawo kwakanyina muntu wakupanda bulongo. Mpawo Wa kalenga muntu kuzwa ku lusoko lwa nyika. Lino, basikubikka matobelanwa zyakacitika, abamwi bambi, a baaba bantu bavuntauzya a ku bweza mafuwa akaindi, azimwi zimbi, a kusyoma mu kusumpuka kwakucinca bucebuce. . . Ndi syoma mu kusumpuka kwakucinca bucebuce kuli kabotu. Muntu ulacinca bucebuce muli lwakwe, pele kutali boonse kuzwa ku seelo lyomwe. Peepe, munene, nkaambo ii—ii muyuni wali muyuni kuzwa cindi Leza naka mupanga kuba muyuni, a sokwe ngu sokwe, muntu wakali muntu. Mbo mbubo.

²⁹ Lino, Nda kali kwaambaula kuli dokotela okuno kaindi kakainda, mu Louisville. Wa kati, “Baa, Muf. Branham!” Nda kali kwaambaula abo bana babulongo bamu Africa, obo mbo balya, kuunka buyo ansi ku. . . Oh, zintu zimwi zibyaabi loko nzomwa kasola kubona, obo mbo bakali kulya! Kubwezelela buyo zintu ezyo zilaatombe, mvunyu muli nzizyo, ku zikunkumuna buyo koonse, mvunyu a zyoonse. Ta cibambi lwandaano lulilonse kuli nguwe. Mwabona? Ba kati. . . Kunywa kufumbwacintu, ta cibambi lwandaano luli lonse eco mbo cibede. Wa kati, “Pele, Muf. Branham, abo bantu tabali bantunsi.”

Nda kati, “Oh, iiyi, mbo babede. Balo masimpe mbantunsi.”

³⁰ Nda kati, “I cintu cili munsu kukozyanya a muntunsi, mu munzila ya banyama, ngu chimpanzii. Elyo mwasoleka kwa myaka ili zyuulu zyone kujana mwaambo omwe uutamvwiki kuli chimpanzii oyo, nkabela ta konzyi ku cicita,” Nda kati, “nkaambo takonzyi kuyeeya. Ta jisi cakubelesya kuyeeya.” Oh, mula konzya ku muyiisya zintu ziniini mbuli mbizi, gee a haw,

na kusama ma gilazi, na kufweba mundundu, na kuli sitikizya mwini aa ncinga, kutanta mbizi, na cintucimwi mbuli ceeco, pele mbubonya mbuli “gee” a “haw” ku mbizi, na “wheet” ku mubwa, na cintucimwi mbuli ceeco. Nda kati, “Walo munyama.”

³¹ “Pele kondi lekela kujokela mu Africa, ku mukowa wamusokwe loko ngo bajisi, alimwi oyo mukowa muniini wa basimpiningile.” Elyo Nda kati, “Ambweni syaanyinakulu mupati mupati mupati mupati taka bona mukuwa naanka cintu. I cintu buyo ncazi, tazi nokuba kuti nkuli ku janza lya lulyo alya lumwesi. I cintu buyo ncazi nkulya, alimwi ulya ceeco nca konzya ku bikka maanza akwe, ikuti na ni nyama ya muntunsi, cili coonse cimbi, ta cibambi lwandaano kuli nguwe, mbubonya obo buyo ulalya. Pele andi mubweze kwa myaka yosanwe, alimwi kwa myaka yakukomena ili kkumi aisano uyo kanana Chikuwa cibotu a kuba alwiiyo luli kabotu. Nkaambonzi? Ujisi buntu. Leza waka mubamba kuba muntunsi, alimwi uli jisi nguzu zinji zya kumvwa Makanimabotu, nokuceya ciindi comwe, mbuli mbo tu jisi a ku kambauka koonse okuno, America yoonse, ku bantu, kuloolola a kuloolola a kuloolola, a kulombelela, kusungilizya a zintuzyonse. Amuleke akaamvwe ciindi comwe, aku mulangilila kakwiila aku zuzila ku cipaililo caku fwambaana loko.” Mwabona? Iiyi, munene!

³² Mbombubo moyo wangu mboubede, mukwesu, sunu, cindi Nda yeeya Africa, a maanza ayo maniini asiya atakweankwaaya kaatambika, kwaamba, “Mukwesu Branham, ciindi cimbi buyo kujatikizya Jesu!” Oh, maa! Kuli cintucimwi muli ndime cisya a kupya. Cakufwambaana buyo Nda jana mali manji, Nka sike oko, akwalo. Eco ncencico Nce cita ku sheleni lyonse Nde jana, zintuzyonse, Leza ulizi, kunze buyo lya ceeco Nce konzya kulya. Alimwi bantu banji bala ndipa zisani zyangu. Alimwi eco buyo Nce konzya kupona acalo mu bupatizi, lwangu, buyo kulangisisya mbuli Mbwe konzya, Ndi cifusila moonya mu mali aa bumissionari eco mfulumende ncoya kabamba. Nse bbadeli nouba mutelo wa kuvola ali nkuko. Ku jana zzyotatwe na zyone, madollar ali zyuulu zzyosanwe, elyo Nda tola okuya koonse a kuyo kambauka Makanimabotu ku bantu abo Mbe zyi ku buzuba obo Njo peda bwiinguzi. Alimwi Njo ziba cintu Nceyo peda bwiinguzi.

³³ Nda kali kunga, cindi ni Nda kali kunjila mu dolopo, Nda kali kupanga muswaangano mupati kaindi cindi nibaka jisi mali manji, alimwi bali jisi ya nguzu mipati a madollar ali zyuulu, Nda kali kunga ndaapa kuli ba Red Cross abamwi bambi. Lino, lino, kutali kuubausya ali mbabo, pele kuselemuka kagwagwa mu mootokala wa madollar ali zyuulu zyone, aujisi mbali mpati zya dayamondi zilesya kutezeleka, kufweba mundundu, a madollar ali myaanda yosanwe mu mvwiki eyo baciswa bant- . . . Peepe, munene! Peepe, nconzyo! Elyo ali zeezi, mbowa zwida buyo mu dolopo, ba lati, “babumbulusi basalala,” a zintuzyonse

mbuli boobo, a ku fubaazy, a kuubaasya bukombi obo mbo twiiminina. Peepe, munene!

³⁴ Nda cibweza lwangu, alimwi kumbele lya Leza mbuli Mubetesi wangu, Nda abikka mu mulimo wa Makanimabotu okuya, aboobo Ndi lizi kuti ku Buzuba obo Ndi yo...cindi Neyo elela kupa bupanduluzi bwa bubanzi bwangu, buli pedwe cakululama. Mbo mbubo ncobeni, nkaambo Nda mwisya kuti mbuli Mbwe langanya bantu Ndi langanya Leza. Bulanganye bwangu buyo kujatikizya ndinywe mbo bulanganye bwangu kujatikizya Kristo. Alimwi bulanganye bwanu kuli ndime ncintu nciconya, mbo mbubo, kujatikizya Kristo.

³⁵ Lino, ku bona bantu mbuli boobo, aku bona obo muntunsi, mpawo, a buntu butafwiki lino, obo butakonzyi kufwa, butakonzyi kuloba, butakonzyi kucita cintu pele kuba aa Buumi butamani, obo Leza cakwaanguluka, mu luyando Lwakwe Mwini, kabupa kuli ndinywe. Elyo lino, mpawo, lino Ndi . . .

³⁶ Andi lulamike eci aniini buyo, na kwaamba cintucimwi. Muntuumwi uyo unka a kuti, “Mukwesu Branham muna Calvin.” Peepe, Nseli obo. Ndili muna Calvin kufumbwa kuti muna Calvin kali mu Bbaibbele. Pele cindi muna Calvin azwa mu Bbaibbele, mpawo Ndili muna Arminia, mwabona. Ndi syoma mu busalali alimwi Ndi syoma mu buna Calvin, amwalo. Pele, bobilo babo, umwi ulaunka ku mutabi a kuunka nzila *eyi*, alimwi umwi ula unka ku mutabi a kuunka nzila *eyo*. Ikuti nikwa takali Bbuku lya ba Efeso, ku cijosya aku cibikka mu busena bweelede awo Leza mpa kabikka, toonse ni twali nyongene. Pele bobilo bajisi njiisyo, pele baunka kumiza mbuto ali njiyo, aumwi, abo mbasalali abana Calvin, abalo, ba Arminia. Lino, bana Calvin bajisi cintucimwi cabwini. Nda syoma obo, kuti njiisyo yabuna Calvin . . .

³⁷ Nda cisyoma eci. Mu bukwabilizi, Nda syoma kuti Mbungano ijisi Bukwabilizi Butamani. Kufumbwa mubali wa Bbaibbele ulizi obo, nkaambo Leza waku Ya amba kale kuti ciyo yutuka kutala kakutakwe kampenda. Mbo mbubo na? Nkokuti, Iyo obako. Mbo mbubo na? I Bb-. . .I Mbungano ilikwabilidwe Cabutamani. Lino, sena uli mu Mbungano, nce cintu citobela. Ikuti na uli mu Mbungano, ncibotu, ulikwabilidwe antoomwe a Mbungano, pele ncibotu wakkalila mu Mbungano. Elyo mbobuti mbo njila mu Mbungano? Kwiinda ku kusukana maanza na? Peepe. Kubikka zina lyako mu bbuku na? Peepe, munene. “Kwiinda ku Muuya omwe toonse twa kabbizigwa mu Mubili omwe.” Nkabela oyo Mubili, Leza ngwaka beteka a Kalivari, wakali Mubili wa Jesu Kristo, elyo twa kabbizigwa mu Mubili oyo kwiinda ku Muuya omwe. Tu jisi Bukwabilizi Butamani kufumbwa kuti katuli mu Mubili wa Kristo, taakwe cintu cikonzya kutwandaanya, taakwe cintu cikonzya ku tuguma. Ikuti wazwa, kozwa ku luyando lwako omwini. Pele mbuli kasimpe buyo, ikuti na uli mu Mubili wa Kristo, mbuli kasimpe

Jesu mbwa kabuka kuzwa ku bafu, uyo buka ayebo. Leza waka cicita kale eco. Wa . . .

³⁸ To konzyi kubisya. Oh, ula cita . . . Inga nkeli sizibi mu meso anu, pele ikuti na Ndili muli Kristo, Leza ta ciboni, nkaambo zibi zyakwe zilalungila . . . Bulowa Bwakwe bulalungila zibi zyangu okuya. Mwabona? Nse konzyi kubisya. “Oyo wakazyalwa kwa Leza taciti cibi, nkambo ta konzyi kubisya. I mbuto ya Leza ilakkalilila muli nguwe.” Mwabona? Walo, uli libambilide ku, ikuti wa lubizya, kasimpe, mpoonya uli libambilide ku kwaamba. Ikuti na Munakristo wini, uyo cicita. Ikuti na wa cisisa, utondezya kuti takwe cintu nca jisi, mu busena butaanzi. Mbo mbubo. Takwe cintu nca jisi, ku kotalika. Pele ikuti na Munakristo wini . . .

³⁹ Nkoonya okuno, wa byala museke wa whiiti mu bulongo, lyoonse unoli museke wa whiiti. Insoke inga kazi zungulukide koonse, a zintuzyonse zimbi, pele unoli museke wa whiiti kufumbwa kuti kayiimvwi. Mbo mbubo na? Alimwi ikuti na muntu wakazyalwa ncobeni ku Muuya wa Leza, tali mu busena lyoonse, alimwi oku a kooku, a kookuya mu inyika a kookuno. Peepe, munene. Peepe, peepe. Toli nsoke buzuba bomwe a museke wa whiiti buzuba butobela. Leza tajisi eco mu muunda. Iiyi, munene. Ikuti na wakazyalwa ku Muuya wa Leza, uli Munakristo kuzwida ciindi eco kusikila . . . kusikila uka unke, elyo mpawo uli—uli utafwiki, antoomwe a Leza. Mbo mbubo, ikuti na uli mu Mbungano.

⁴⁰ Lino, lino atwa ambaule ku lubazu lwa lufu. Lino, mbobuti muntu mu caabilo eco, mu musyobo oyo wa ciimo, mbwakonzya kuciswa? Nkaambo kakuti mubili wako tauna nununwa. Mubili wako tauna nununwa. Tacikwe makani nkunji, obo mboli kabotu, a boobo mboli musalali, a boobo mbosalala, akunji kwa Muuya Uusalala, obo mbuntu bwako buyo. Alimwi buntu bwako tabuna maninina. Bu jisi buyo Cilongezyo, cisyomezyo ca Leza, cili ncizibyo ca lufutuko lwesu. Pele lino ikuti na ta tu jisi cizibyo ca bubuke bwesu, taakwe kuponesegwa kwa Buleza, nkokuti Njo bula kaanzambwene na taakwe cintu caku tondezya kuli ndime kuti kuli bubuke.

⁴¹ Mbulonyi mbuli kuti Kristo taponeni mu moyo wangu, ikuti na Nde elede ku cibweza kuzwa ku cintu ca musyobo umwi ii—ii wa cintu calwiiyo lwa kulilemeka kwa mizeezo kaindi okuya, kweelela kusyoma kubusenabumwi mbuli boobo, ee, mpawo inga Nda—Nda—Nda ba sikudonaika aniini kuli ncico. Elyo ako nke kaambo, omuya mu Africa, cindi baboola, mpaawa kwaboola mamisionari, kuleta zyuulu zya baabo bana babulongo, alimwi bakali kunyamuna mituni miniini yabulongo yakaindi a zintuzyonse zimbi, nkaambo kakuti bakamvwide buyo cibeela canguzu zyamizeezo zigambya ca Bbaibbele. Mbo mbubo. Elyo mbungano yangu ini ngu Baptisti, Methodisti, Presbyteria, boonse abo baka njila omuya. Pele cindi niba

kabona nguzu zya Leza kazitondezegwa, eco caka cibamba, ba kaziba mpawo kuti Leza wakali Leza.

⁴² Pele, lino, ncinzi citalisya kuciswa oku? Lino, cintu citaanzi, walo muuya kautanaba bulwazi, mbubonya buyo mbokali muuya kotanaba muntunsi. Lino Njo bweza Mukwesu Willett awa mbuli mukozyanyo. Mukwesu Willett, Ndi. . . Kwa kali ciindi elyo yebo a Ndime nitwa takali cintu. Elyo mpawo cintu citaanzi, Leza waka tupa buumi. Elyo atu bweze, kwaamba, ikuti na Nda bweza mubili wako kunselelo masikati aya, upangidwe aa cikama ca maseelo, aajisene antoomwe a maatomu. Elyo lino, bumwi buzuba ayo maatomu ayonyonyoonwa, na Jesu katanasika. Uyo zumanana kujokela. Ayooba buyo mbubonya mbwa kabede ku matalikilo, kujokela mu luwo. Pele cindi muuya wako wakubweeda, ayo maatomu ayobungana alubo antoomwe a muuya oyu a kuleta umbi Mukwesu Willett mbubonya mbuli ulya umwi, muniini loko buyo, acindi naakali aa bubotu bwakwe bwiinda.

⁴³ Cindi muntu ainda a myaka yakukomena ili makumi obilo ayosanwe, ujana kusutana kusyoonto kungsi lya meso aakwe, a masusu ajisi mvwi kaamena. Ci yooba, nkaambo lufu lutobela nduwe. Alimwi bumwi bwa mazuba aya luyo kutola. Tacikwe makani na nduweni, luyo kutola. Pele bucebuce lu. . . Uyo sika mu kkona awa, nkabela Leza uyo kugusya mu kkona eelyo, alimwi wasika mu kkona eli *awa*, lufu luno tandila ku kubweza, alimwi awa, pele kwaakwiinda kaindi luyo kutola. Pele mpawo, eco lufu nco lukonzya kucita, lula bweza kunyonyona kwalo kuzwide, elyo mpawo a. . . cindi lwa cita coonse eco nco lukonzya kucita. . . Cindi Leza naka kupa buumi obu, elyo wakali aa bubotu bwako bwiinda, akutandila makumi obilo aitatu, cindi waku boola mu bubuke uyo jokela mbubonya buyo mbo kabede cindi noka jisi myaka yakukomena ili makumi obilo aitatu, makumi obilo ayosanwe, lufu kalu tana njila. Lufu luyo jana zintuzyonse nzo lukonzya ku cita. Lula njila mukati omuya, pele uyo jokela ncobeni mu nzila njo kabede.

⁴⁴ Lino, ikuti limwi lya maseelo aako—aako mu mubili wako, atu cilete ansi lino, uba seelo kwamana seelo, seelo kwamana seelo, a ku andaanya awa aa cibumbili, kwamana seelo alimwi mu mubili wako, uyo selukila ku nseke yomwe niini oko nkoka talikila, taikonzyi kubonwa ameso akunyama. We elede kulanga kubelesya magilazi akulanzya zintu. Nda kabona nseke ya buumi kungsi lya maikkrosikkopu. Ili bonya mbuli katambo kaniini. Alimwi cintu citaanzi citalika cili moonya mu moongola, cili mbuli kakoto ka katambo kaniini kaangidwe. Elyo nde seelo liniini litaanzi livuzyanya atala aa seelo.

⁴⁵ Lino, ikuti na Nda bweza seelo eelyo lyomwe liniini oko nyoonse nko mwazwida, seelo lyomwe liniini loko, nseke. . . Ino nseke ninzi? Ii nseke nkantu kaniini, seelo liinda kuceya. Ee, ncinzi citobela ceeco? Lino, Nda kuselemuna kuzwa ku

kabeela kako koonse kaniini, kuselemukila ku seelo eli liniini, elyo Nse na kujana. Ndi jisi buyo maseelo aabikkidwe kabotu. Ee, mpawo, cintu citobela, maseelo aa bulowa, a maseelo aa nyama, a kufumbwa mbwaabede, kwaabikka kabotu oonse awa, pele Nse na kujana. Lino, Ndila ansi ku nseke yomwe lino. Ee, Njo zapaula seelo elyo liniini. Lino, mpaali mpo bedede? Buumi bwako. Elyo buumi bubamba seelo litaanzi, eyo ni nseke, mpawo zintuzyonse kuba mu bulenge bwalyo; mubwa mbuli mubwa, muyuni mbuli muyuni, muntu mbuli muntu. Kusumpula maseelo, seelo atala a seelo, seelo atala a seelo, kuya buboola kusika waawo mpo bedede, muntunsi, kusumpuka kwa maseelo. Lino, eco cakaanzwa aa Leza kuba boobo.

⁴⁶ Pele, lino, ino kujatikizya kkulenge? Atu mwaambaule kwa kwaindi kaniini buyo. Lino, Leza waka kupa buumi bwako. A kuti, mpaawa mpoli sunu, mpaawa Mpeli, ta—ta kukwe cintu mu janza lyangu, pele inga kakuli kkulenge mu janza lyangu ciindicimwi. Ee, mbobuti eelyo kkulenge mbolya kasika awo? Atu bone ikuti na kkulenge ninzi, lino atu lizapaula, atu libweze. Lino, ncikama ca maseelo, alyalo. Sena mwakalizi obo? Cikoto, mancenga, kufumbwa ca zintu ezyo maseelo. Ta zikwe ziimo zyabupange. Zimwi zyazyo zilayambukila anze, alimwi zimwi zilibonya . . . zyeenda mu myeengo ya misyobo yaandeene, kkulenge lisalala pyu, mbubonya mbuli tutambo tulamfu tsubila oto tweenda kwinda mu i . . . Elyo mpawo kuli kkulenge lili mbuli duba lisalala elyo kanji liboola ku nkolo zya mwanakazi, lili mbuli mapanikkekke aalede ali limwi alimbi, elyo mpawo alaunka kuya kuyandilila. Nkabela alakomena abusena buli bonse.

⁴⁷ Ziindizimwi zikoto zili cengeme, *eyi* nzila, ncilamfu, bulamfu bwiinda bukwasule, a zintuzyonse. Ta zikwe ziimo zyabupange, nkaambo zili mbuli muuya utakwe ciimo ca bupange. Pele nkusumpuka kwa maseelo. Ncikama ca maseelo eco, twaambe, muli nduwe ndyoonya lino kuli cikoto na kkulenge, nkusumpuka kwa maseelo, kukomena, kukomena, kukomena. Ci lalya, kunyonka buumi bwako kuzwa kuli nduwe. Ci ponena ku bulowa bukunka. Mancenga abweza mamina aa liso a kukomena mpoonya ali ngawo, kulivumba eni, kujala meso ako. Amwi alaboola a kuta . . . mbuli buyambukizi bwa kakweekwe, ako kaboola buyo mu nseke niini. Takukwe cintu ku musela wa nkako. I musela ngoonya wa nseke upanga muzovu, upanga ii—ii ntabwa niini. Mwabona? Taakwe cintu ku musela wa nseke.

⁴⁸ Elyo zimwi zyazyo zibweza ciimo ca mubili, zimwi tazi citi. Alimwi zimwi tazi njili mu maseelo. Zimwi ziba muuya, kufwabya buntu. Tuyo sola ku bweza cibeela eco, Njo siya cibeela eco kuba ca juunza masakati, ikuti na Nda konzya, oko buntu obo bwa muuya nkobuzwa, a nzila ansi *awa*.

⁴⁹ Elyo lino, beenzuma, Nsya ambi ceci kuba musyobo umwi wa lwiiyo lwakuli lemeka kwa mizeezo. Nda kabeleka zya madaimona kwa myaka, alimwi mulizi obo. Ikuti nimwali cizi biyo cintu, kwamana kuswaangana masiku, eco cicitika ciindicimwi. Ta muzi. Amuyeeye, cindi waboola kulwana muuya, ncibotu waziba eco nco wamba. Uta imi buyo awo a kulilemeka bumwi, nkaambo tacika kugwasyi pe. Pele cindi mubwini daimona nolyeelede ku kuswiilila, uyo ciziba. Ta kuli obo mboongolola kapati, takuli kunji kwa mafuta ngo nanikwa. Nceeco cili kunze awa ncayo ziba, Bwini. Jesu waka mwaambila buyo kuti, “Kozwa.”

⁵⁰ Amuyeeye, basikwiiya bakali kubbakela a kugwalangana, a kusoleka ku mutanda, a zintuzyonse. Ba kati, “Nkaambonzi ti twa kakonzya ku mutanda?”

Kati, “Nkaambo, kakutasyoma kwanu.”

⁵¹ Kati, “Kozwa muli nguwe.” I mulombe wakawida aansu nkabela wa kasuntuka kukali kwiinda nkwa kasola kuba ako. Mwabona? Mwabona? Ba kaziba bwami.

⁵² Amulange balombe abo kunselelo okuya, abo basimutuntuli bakabona Paulo katanda badyabulosi. Ba kati, “Tula konzya ku cita cintu nciconya,” bana ba mupaizi umwi. Aboobo bakaselemuka akuti, “Tula konzya kutanda badyabulosi.” Ncito 19. Ba kaunka kunselelo ku mwaalumi wa kajisi kuganyuka kwa kasuntu, akuti, “Twa kulailila, kwiinda kuli Jesu. Kozwa muli nguwe. . .” I dyabulosi wakati, “Lino. . .” “. . . mu Zina lya Jesu, oyo Paulo ngwa kambauka!”

⁵³ I dyabulosi wakati, “Lino, Ndili muzi Jesu alimwi Ndili muzi Paulo, pele ino ndinywe bani?” Mulizi eco caka citika. Kasotokela aa baalumi, kazapaula zisani zyabo, nkabela bakaba akuganyuka lwabo, aku zuzila mu kagwagwa.

⁵⁴ Alo madaimona ngaonya alapona asunu, aboobo kuli ziimo zinji zyakwiindilizya. Eyi ni mbungano, mangolezya aya. Kuli ziimo zinji zyakwiindilizya mu nyika sunu, zitegwa kuponesegwa kwa Buleza, ezyo zyeedelede kuumuzigwa. Nce ciletela sampu atala a Kaambo keni. Nke kaambo nco mujisi kupapanyana kuyumu kuli boobo. Kuli zintu zinji zitegwa bukombi, sunu, ezyo zyeedelede kuumuzigwa. [Kabeela katakwecintu aa teepu—Mul.] Taakwe cintu pele tukamu twa nguzuuzu! Eco nce cibamba Mbungano ini ya Leza kuba a kupapanyana kuyumu kuli boobo ancico. Pele tuli ba America, mwabona, eyo nje nzila yakuba. Leza waamba kuti whiiti a tusamu tutanta akuzambaila zisamu a ziteo zyamaamvwa zyakakomena antoomwe. Muta soli ku zinsonkola. Amu zileke zikomene antoomwe, pele kwiinda ku micelo yabo muyo baziba. Takukwe micelo, baa, takukwe Buumi, takukwe cintu okuya.

⁵⁵ Lino, amulangilile seelo eli. Atwa ambe, kupa mukozyanyo, mbuli bunji bwa ciindi, kkulenge lisubila kanji yuuma luzyalilo

lwa mwanakazi, zicuzu zya bwanakazi a zimwi zimbi. Eno obo, atu bweze ceeco, ulya mulombwana kumselelo eno, aa seelo lyakwe, kkulenge eli—eli. Lino kkulenge. . .

⁵⁶ Zintuzyonse kunyama zitondezya zya kumuuya. Sena mulizi obo? Zintuzyonse kunyama zitondezya zya kumuuya, nekuba.

⁵⁷ Ku mukozyano, mbuli oyu, cindi—cindi twa zyalwa mu Mubili wa Kristo, kuli zintu zyoatwe zicitika ku kutuleta Kuzyalwa kwesu. Alimwi ezyo nze zintu zyoatwe zyakazwa mu buumi bwa Kristo cindi Na akafwa. Mpaawo kwakazwa mu mubili Wakwe, maanzi, Bulowa, Muuya. Sa mbo mbubo? [Mbunga yaamba, “Yaa.”—Mul.] Zintu zyoatwe, ezyo nze zintu mo twiindamo cindi twa zyalululwa: kululamikwa, kusalazigwa, lubbizyo lwa Muuya Uusalala. Lino, ezyo zyoonse zilakonzya kuba mu kucitwa komwe. Pele citola. . . Pele inga waba muciioma ca kululamikwa ka kutakwe kusalazigwa. Ula konzya kusyoma mu Mwami Jesu Kristo pele inga kociya buya antoomwe a busofwi bwako. Pele ula konzya kupona ncobeni mu kululamikwa a buumi busalala bu njoloma, nkabela ka kutakwe Muuya Uusalala. Mwabona, Bbaibbele, Johane Mutaanzi 5:7, yakati, “Kuli zyoatwe ezyo zipa bumboni ku Julu, Taata, Mwana, a Muuya Uusalala, alimwi. . . Taata, Ijwi, a Muuya Uusalala,” oyo wakali Mwana, “nkabela ezi zyoatwe nzimwi. Elyo kuli zyoatwe zipa bumboni a ansi, maanzi, Bulowa, a Muuya, nkabela zila zuminana muli comwe.” Kutali kuti nzimwi, pele zila zuminana muli comwe. To konzyi kuba a Taata ko tajisi Mwana; to konzyi kuba a Mwana ko tajisi Muuya Uusalala, nkambo nzimwi zitakwe bwaandaanye, omwe. I triniti ili muli comwe.

⁵⁸ Ta ndicimvwi okuno koonse, pele ulamvwa kunji ku cisi coonse, cimwi ca zintu zipati maningi mu nkamu zya Pentekoste, nkunyongana mu cintu eco comwe cuubauba. Elyo Nda kabikka beendelezi antoomwe ncobeni a kutondezya kuli mbabo kuti basyoma cintu comwe. Ngu dyabulosi akati kabo, kwa mana. Ikuti na eyo mbungano mpati ya Pentekoste inga ye- . . . yasowela ansi tunsiyansiya tuniini, twa kaindi akuli bunganya beni antoomwe mu Mbungano yomwe ilelekedwe ya Leza, Kukwempwa inga kwasika. Pele kufumbwa kuti Saatani kakonzya kubikka mu mipampo, yaa. Eyo nje nzila yakwe ya kucicita. Elyo bala syoma cintu nciconya ncobeni.

Umwi wati, “Ee, *eci* calo Nceciya.”

⁵⁹ Nda kati, “Ee, kuti na *eci* Nceciya, nkokuti Eco nce *eci*.” Aboobo mpawo mpo mubede. Aboobo, ncintu nciconya coonse. Pele mpawo mpo mubede, muli trinity yabutatu bwa Leza. Lino, lino, Leza mu bumwi Bwakwe. Leza Taata, Mwana, a Muuya Uusalala. Lino, ta twaambi kuti “baleza besu,” mbuli bahedeni. Ngu “Leza wesu.” Mwabona? Bwalo Mbube bwabutatu ibwa Leza.

⁶⁰ Lino amubone, lino, Saatani awalo uli mu triniti. A nguzu zyakwe zili mu triniti.

⁶¹ Lino, pele amubone mpawo cindi maanzi, Bulowa a Muuya zya zjala Kuzyalwa kupya. Sa mbo mbubo? Lino amulangilile. Eco nce ciiminina Kuzyalwa kupya. Ncinzi ciiminina kuzyalwa kwakunyama Kuzyalwa kupya kakutana boola? Cindi... Nywebo no bamatumbu, cindi muvwanda azyalwa, ncintu nzi cisaanguna? Maanzi. Citobela, bulowa. Citobela, mwabona, eco nce cibamba buumi, mwabona, cipanga muntu. Maanzi, bulowa, muuya.

⁶² Eno, kkulenge, atuli langanye kuba cesu citobela. Tu jisi maminiti asyeede atandila kuli osanwe, Nda yeeyela. Kutandila maminiti osanwe atobela, atu langanye kkulenge. Ino nguni oyo mulombwana? Ino wi iminina nzi? Ngu sikubwezelela bwezelela. Wi iminina kkubi, ulya zintu zifwide. Elyo kkulenge lizwida kucicuzu, kanji, awo seelo mpolya kaumwa nkabela lya—lya anduka. Elyo seelo lisoonto mukati omuya tali beleki kabotu. Oh, elyo ndi bbala pati ku muna Baptisti, endyo na? Yaa, pele tali beleki kabotu, eelyo seelo. Ndili muna Baptisti oyo usyoma mukuwa.

⁶³ Muntu umwi wakati, okuno kunselelo mu muswaangano waku Arkansas buzwa bumwi, wakati, “Mukwesu Branham,” wakati... Wakali mulombwana mu Nazareni. Wa ka ponesege. Wa ka jisi yakwe...Kaunka kweenda ncobeni koonse mu dolopo, azya kweenzya zyakwe aa makuko aakwe. Wa kati, “Uli zyi cintu na?” Wakati, “Cindi Ne kasika okuno lutaanzi,” wakati, “Nda—Nda ka kuyeeyela...ku kumvwa kokambauka, Nda ka kuyeeyela kuti wa kali muna Nazareni.” Wa kati, “Elyo Nda kabona bantu banji mba Pentekoste, nkabela muntuumwi wakanda ambila kuti wakali muna Pentekoste. Elyo lino wati uli muna Baptisti.” Wakati, “Nse cimvwisiyi.”

⁶⁴ Nda kati, “Oh, eco nцитete.” Nda kati, “Ndi muna Pentekoste Nazareni Baptisti.” Aboobo obo—obo mbo mbubo. Yaa. Peepe, tuli bamwi muli Jesu Kristo, kwiinda ku Muuya Uusalala utu bamba kuba bamwi. Mbo mbubo.

⁶⁵ Lino, amubone, seelo eli liniini tali beleki kabotu cindi lya cuzulwa. Lila talika aniini. Tumwi tuzunda tuniini tuzuzila kupa buumi bwato mukati omuya. Obo mbo busina buzwa mu cilonda. Abo basilumamba baniini balwanina kuvuna buumi bwanu. Bala zuzila omuya a—a kuuma busaki obo bujaya, zyalo nguzu zya madaimona ezyo zisola—kusoleka kubungana omuya, a kupa buumi bwa ngawo. Eco nce cipanga...Eco... Balo ncikama ca basilumamba baniini bafwide, obo busina buli mu bulowa bwanu...buli mu ii—mu cilonda, abo bapa buumi bwabo ku kuvuna bwanu.

⁶⁶ Lino, fumbwa buyo kuti seelo liniini lyata beleka mukati omuya nkabela eli daimona lila talika, lila talika kukomena,

kutalika kuvuzya maseelo. Lili mu kukomena kuba mubili mbubonya biyo mbuli bavwanda banu mbo batalika mu zyalilo lyako, a mbubonya mbo kacita muli banyoko. Seelo atala a seelo, seelo atala a seelo, seelo, nzila ili yoonse, kuli koonse; buyo, ta jisi ciimo ca cintu mbuli muntunsi, kukozya bulenge bwalyo. Li zwa buyo mu muuya. Li komena buyo mu nzila ili yoonse, alimwi liyo talika seelo atala a seelo, seelo atala a seelo.

⁶⁷ Elyo lino, cintu citaanzi nywebo mulizi, uyo talika kukompama a kulimvwa kuciswa. Ula inka kuli dokotela nkabela uyo kulangalanga. Ambweni taka lijani. Ikuti na wacita, ambweni uyo litenda. Ikuti na wakonzya kulitenda kabotu, ncibotu, wali gusya. Pele ikuti na takonzyi kuli tenda kabotu, mpawo ikuti na lili mu kameneno na amwi awo mpoli takonzyi kutendwa kabotu, kabeela komwe kaniini ka ndilyo kayo zumanana kupona. Mwabona, nkaambo tacili mbuli kuti wa kosola janza lyako a ku cibamba, na kufumbwa cintu, na wa kosola. . . Eco Nce amba, ikuti na wa kosola mubili wini onse, a kusiya janza lyako alya, baa, tali konzyi kupona. Pele—pele, mwabona, oyo tau jisi ciimo ca buumi mbuli mbo jisi. Ni nguzu zya daimona zyeenda.

⁶⁸ Elyo lino amubone, mwa aita, dokotela uliita kuti, i “kkulenge.” Leza uliita kuti “dyabulosi.” Amulange sunu. Ba li jana buyo. . . Lya kazwida kuli bbala lya *kkulenge*? Lyalo lizwida ku. . . kuzwa ku bbala lyaci Latini eelyo libelesegwa mu bwiite bwa masilike, lyaamba ii “nkala,” nkala eyo njo bona aa nkomwe ya lwizi, ijisi mauulu koonse. Eyo nje nzila mbo—mbo icita, ilasika konse, kuyandilila konse. I bbala kkulenge ni nkala. Elyo ila njila mukati a kuzumanana buyo kujatilila a kunyonka bulowa lyanoya bweenda, mbuli okutopasi na cintucimwi. Baa, cikoto, mancenga, aamwi malwazi, oonse azwida ku kazunda, alimwi ako kazunda kaelede kuba mubili. Elyo ka katanaba mubili, keelede kuba buumi. Kakatana konzya kulenga na—na kusonsa a kuvuzya maseelo aambi manji, keelede kuba buumi. Kuliluleme na? [Mbunga yaamba, “Ameni.”—Mul.] Lino, eelyo kkulenge lya kazwida kuli? Nguni, ino nkokuli nkolya kazwida? Tii lyakali ali nduwe ciindicimwi cakainda, pele lino ambweni lili ali nduwe. Ino lyazwida kuli? Mbuumi bumbi obo bwiimpene kuzwa kuli bwako, bupona muli nduwe. Elyo bulapenzya, bunyonka buumi bwako. Ako nkekaambo Jesu nca kaliita kuti “dyabulosi.”

⁶⁹ Ba laita kuti kasuntu sunu, ba lati, “kasuntu.” Baa, kasuntu, mu Bbaibbele, Jesu wakakaita kuti “dyabulosi.” Cindi muntu nakaboola a mulombe waka wida ansi, a kuzwa ccovu ku mulomo, a zintuzyonse, wa kati, “Ujisi dyabulosi, nkabela bunji bwa ziindi ula musowela mu mulilo, mu maanzi.”

⁷⁰ Lino ba kabotya zina lyakwe akuliita kuti kasuntu, pele ngu dyabulosi. Elyo Jesu wakati, “Yebo dyabulosi, kozwa mu mwana!” Mbombuno. Lino, kasuntu kanjikanji kalaletwa kuzwa ku penzi lya nsa. Ambweni tuyo njila muli ceeco kwainda kaindi

kasyoonto. Mwabona? Li letela kasuntu, kuzwa kukujatwa kwabulowa mu minsyu.

⁷¹ Lino, amubone muli ceeci, mpawo eliya seelo lilakkala awo, ngu dyabulosi. Uli mukuyaka buumi; uli muku komena, kuba bupati maningi a bupati maningi. Ujisi bulizi bomwe bwakucita, mbwa ku, tola buumi bwako. Nce ncico eco dyabulosi ncaka litumina, ku kucesya mazuba aako kuba makumi ali ciloba.

⁷² Lino, Nda lemeka dokotela oonse. Iiyi, munene. Kufumbwa sayaansi ya masilike, Leza abaleleke ku lugwasyo ndo ba kacitila bantu. Eco cili luleme. Ino inga wacita nzi mu inyika sunu kakutakwe njiyo? Ndi lumba Leza ku sayaansi ya masilike. Ndi lumba Leza ku mootokala wangu. Ikuti Leza na takalekela sayaansi kundi pangila mootokala, Ne ndi jisi ciindi ciyumu kweenda kuboola okuno. Ku malaiti aa magesi, a ku nsipa yaku sanzisya maanza angu, a musamu waku kumbya mena angu, nconzyo. Nda Mu lumba ku zintuzyonse, nkaambo zintu zyoonse zibotu zizwa kuli Leza.

⁷³ Pele andi mwaambila, takukwe kabeela komwe ka musamu ka kasola kuponya kuciswa kuli koonse. Alimwi takukwe dokotela omwe, cita wa lweeno, pele dokotela wakasimpe uyo kwaambila kuti balitamina kuba basilisi. Nkoonya ku Mayo Brothers, bunji bwanu. . . Nda ka buzigwabuzigwa okuya, ziindi zystone na zytatwe. Ku balwazi abo bazwida kokuya, batakwe busilike. . . Mwa kabala *Reader's Digest*, mutende wa Vumbipati? Mbangaye ba kabala mutende wa Vumbipati, eco caano cangu omuya, mu *Read's Digest*? Mwabona? Elyo baka nditolede kutala okuya, ikubuzigwabuzigwa kwa muvwanda ngo bakalanzameso. Kati, "Ta cikonzayi kucitwa." Pele Muuya Uusalala wa kandaambila aku ndaambila obo mbo ca keelede kuyo citwa, nkabela caka citwa. Yaa. Lino, baka ndiita kutala okuya. Elyo nkoonya ku citendele oko Jimmy abalo, Mayo yakaliko okuya, kuli citondezayo cipati ncobeni caamba, "Ta tulyaambi kuba basilisi. Tu lyaamba biyo kugwasya bulenge. Kuli omwe Musilisi, oyo ngu Leza." Mbe babotu bainda mu inyika. Lino, tuli jisi bace basilweeno, iiyi. Mbo mbubo. Tuli jisi bakambausi basilweeno, abalo. Yaa. Aboobo, eco cilainka ku mabazu obilo.

⁷⁴ Mubone, pele kufumbwa muntu oyo utamina kuti musilisi, ngu sikwaana, nkambo ta konzyi ku cicita. Nkambo Bbaibbele lyakati, "Ndime Mwami Oyo ulekelela zibi zyanu zyoonse akuponya malwazi aanu oonse."

⁷⁵ Nda kali kulangalanga. Elyo mu kaanda kangu, i. . . bamwi bamadokotela babotu kwiinda ku cisi coonse bakasika. To zyi mbali imbi ya buumi, mweenzuma, kuziba eco cakaliko, a zintu nze Ndi taambi antangalala mu buleya. Baalumi balasika mukaziye. Alimwi muta yeeyi kuti takucikwe ba Nekodema banji mu inyika; incobeni nkobali, zyuulu zinji zya mbabo.

Ba langa ali ceeco a kuboowa mu muswaangano. Kukkala alya kasamide T-sheeti, cintucimwi cimbi mbuli ceeco, a mazina amwi akalondolwa ayo inga ngo konzya kugambwa, ku kkala moonya mu muswaangano. Mu mazuba masyoonto kusobelela kubusena a kutumina kwiinda cakaziye, a ku tuma muntu umwi mu kubuzigwabuzigwa. Elyo akuti ndyoonya lino, kuti, “Mukwesu Branham, Nda syoma Obo Mbwini.” Mbantunsi mbubonya mbuli ndiswe mbo tubede. Masimpe. Elyo muntu oonse uyandisya kulanga kwiindilila cisitilizyo cisiya eco ncayo indamo ciindi cimwi.

⁷⁶ Pele alo makkulenge a zintu ezi zyoonse madyabulosi nconzyo akalibumba mu mubili wanyama, ka yenda, kaatola buumi bwanu.

⁷⁷ Lino, ikuti na inga Nda yanda kucita mbuli dokotela, ikuti na Nda konzya kuli tendulula, ku libikka ansi. . . Na, mbuli buyo, kwaamba, ku mukozyanyo buyo, kuti wakali kkulenge, lwako, a nyika eyi. Lino, nkooku kuponesegwa kwa Buleza. Ikuti na Nda kali kuyanda ku kugusya mu nzila ya dokotela, Ne ndaka zumanana buyo. . . kweelela kucumba mubili wako, na cintucimwi cimbi, kusikila oonse wazimaana kuzwa aa nyika. Inga kacita nooli ncico limbi, mbubonya buyo mbuli dokotela unga wa konzya kugusya cikoto kuzwa kuli nduwe. Pele mu ciimo ca kuponesegwa kwa Buleza, ikuti na wakali kkulenge, inga Nda gusya buyo buumi bwako kuzwa kuli nduwe, nkabela inga ko cizumanana. Buumi bwako inga bwa kusiya, pesi mubili wako inga kauliko awa mbubonya buyo mbuli mbo wakabede.

⁷⁸ Lino, mpaawo kukubona a ciindi mpo zili sinkondonyina mubyaabi kuli Leza mu kuponesegwa kwa Buleza. Ta ndizi na Mukwesu Baxter ulasola kumvwisya zintu ezi mu muswaangano. Nda kakkala ansi, a ku cisandulula kuli nguwe alimwi Mukwesu Bosworth, kuloolola. Pele nceci cakacitika. Nda zumbauzya na bantu banji bala cimvwisya, nkaambo, kwainda kaindi, mu talika kujana bantu kujokela, kwaamba, “Nda kajisi kuponesegwa kwangu, Mukwesu Branham, kwa mazuba obilo na otatwe, pele, Leza aleleke, kwa—kwa kandisiya.” Elyo Nda cijana, elyo Ndi yeeya kuti taba kkali kabotu muswaangano. I bantu taba mfwisyi. Nda kajisi baalumi banji basika ku cibumbili kaboofweede kumaninina, makkulenge, na mancenga ku meso abo, elyo kubala Bbaibbele nibamana ku kombelwa, kabaseluka; mu mazuba obilo na otatwe kuba buyo boofu mbubonya mboba kabede mu busena butaanzi. Ncinzi cakacitika? Muntu onse ulizi kuti cindi buumi bwazwa mu mubili uli oonse, ula nyana kwa ciindi cisyoonto. Sena mbo mbubo?

⁷⁹ Kufumbwa muntu wakasola, okuno, kujaya doe, na ng’ombe, na cintu cili coonse mbuli ceeco? Masimpe. Yaa. Wa ceeleka sunumasiku, nywebo nobavwimi kumasena okuno, no beenzuma bangu. Wa jaya doe mpawo wa mwaanzika a cipimino,

kwaambila balombe mbuli mbwalema. Ko langilila! Cifumo uyoouba kwa mapaundi akubwene kwiinda mbwa akabede. Cindi muntunsi afwa, sikubamba bamba mitunta, cintu citaanzi, ugwisya lino lyakupanga na liso, kufumbwa eci ciliko omuya, ula ligusya; nkaambo, lila nyana, li la tutuluka nkaambo mubili wa muntusi wanyana. Mibili yoonse imbi ilanyana. Cindi buumi bwazwa mu seelo, ilatalika kupusama, kunyana. Liyo cita obo kwa maora ali makumi ali ciloba aabili. Elyo mpawo ula talika kuzimba. Lekela kabwa kaubbutukizye, awa aa mugwagwa. Leka kuulede awo mu zuba kutandila mazuba otatwe, a kulangilila eco cicitika. Ulaba mubwa mupati kwiinda mbwa akabede lyoonse. Ula zimba koonse. Sa mbo mbubo? [Mbunga yaamba, “Ameni.”—Mul.]

⁸⁰ Ee, eco nce cintu nciconya citola busena cindi ii—ii daimona lya tandwa kuzwa ku muntu uciswa. I mazuba mataanzi masyoonto, “Oh, Nda limvwa kabotu.” Mpawo kutalika kwaamba, “Nda—Nda ciswa kwiinda Mbwe—kwiinda Mbwe ekabede lyoonse. Nda sweekelwa kuponesegwa kwangu.” Mbuli cakusinizya lusyomo mbo lwaka bugwisya, kutasyoma kula kujosya ncobeni alubo. Mbuli lusyomo mbo lubujaya, kutasyoma kula kubusya. Jesu wakati, “Cindi muuya mubi wazwa mu muntu, ula inka mu masena mayumu nkabela ula jokela a badyabulosi bambi bali ciloba.” Elyo ikuti na muntu mubotu wa ng’anda na taimvwi kukwabilila mulyango ulya, uyo zamanana ncobeni kunjila. Elyo muntu mubotu wa ng’anda yako ndusyomo lwako. Kwaamba, “Ko tantamuka!” Nce ncico.

⁸¹ Pele lino walangilila mulwazi oyo wakaponesegwa, mbuli lyonse, citakuti maleele agambya kapati. Kwalo, kuponesegwa kwa Buleza a maleele nzintu zyobile zyandeene. Kuponesegwa kwa Buleza, ncintu comwe; a maleele ncintu cimbi. Pele kweendelezegwa kwalyonse ikwa kuponesegwa kwa Buleza, cindi muuya mubi watandwa, dyabulosi wa kkulenge, cindi lyazwa mu muntu, “Oh!” Lino, na kwaamba tula bweza cintucimwi kutegwa ukonzye kubona kapati ciboneka, Ndi yooti, mancenga. Ncinzi caka citika cindi ulya muntu. . . Ikuti na muyo bona muntu moofu. Ta ndizi na Nda kasola kuba umwi na pe, nekuba, meso ajisi mancenga. Nda ba lekela kwiimikila kwa maminiti masyoonto. Nkaambonzi? Kutegwa kupusama oko kutalike kucitika. Ku baambila kuti bakajokela, ku tupa bumboni. “Oh, ma!” Inga ba bona kabotuloko. “Oh, ma! Buyo, inga Nda bona zintu! Iiyi! Nda. . .” Ino ndipenzi nzi? Buumi bwazwa; mubili wa mancenga uli mukunyana. Ee, uyo ocita nzila eyo kwa mazuba masyoonto. Kwaamba, “Oh, ndiya buba kabotu loko.”

⁸² Elyo kwainda kaindi, bala talika kuciswa mitwe, taba limvwi kabotu loko. Wa buka cifumo citobela, “Ndiya buswekelwa kukubona kwangu alubo.”

⁸³ Bamwi babo bakati, “Uh huh, wa kali nyanyamusya. Iya nkamu ya babumbulusi basalala yaka kunyanyamusya.” Uta syomi ceeco! Obo mbubeji bwa dyabulosi. Ikuti na wa syoma ceeco, uyo jokela nkoonya kuba moofu alubo.

Pele ikuti na uyo jatilila ncobeni, kuti, “Peepe. Mwami, Nda syoma.”

⁸⁴ Mpawo ncinzi cicitika? Oyo mubili ulazimba kwa ciindi cilamfu. Kula vumba kukubona oko alubo. Eelyo kkulenge mu mubili liyo ozimba. Uyo talika kumvwa kulitoneka a kuciswa alubo. Elyo uyooba uciswa cabubyaabi, uciswa cakuyoosya. Nkaambonzi? Eciya cikoto cipati ca mubili ufwide muli nduwe cililede awo, kacifwide.

⁸⁵ Wa jokela, dokotela alimwi uyo oti, “Oh, obo mbufuba. Ndeelyo kkulenge mpoonya awo. Nda konzya kuli bona.” Masimpe, nko lili, pele lilifwide. Aleluya!

⁸⁶ Lino, kukunka kwabulowa kweelede kusalazya mubili. Ciindi coonse moyo wa pompa, ufusa bulowa kuzunguluka mubili, alimwi bula bweza kuyambukilwa oko. Masimpe, kuyo kubamba kuciswa. Ino kuti waka jisi cikama ca nyama ilengelela muli nduwe abusena bumwi, na cilamfu mbuli nzoka, na cintucimwi cipati kuzunguluka mbuli kanwe kako, a kulengelela omuya, nkabela cakali fwide, eyo nyama nji kailengelela muli nduwe, alimwi ili mukubola? Ee, mubwini, kukunka kwako kwa bulowa kweelede kubamba oko kakunjoloma, mbuli mbo pompa kwiinda moonse. Pele ngooyo mubili uufwide, cintu cilengelela awo, nkaambo buumi bwazwa kuli ncico. I nguzu zya Leza, kwiinda mu lusyomo, lwa kamutanda. Walo ndi daimona; lyelede kuzwa.

⁸⁷ Pele, kaambo, bantu taba laililidwe. Bala unka, akuleka. Elyo oyo dyabulosi nguwenya wiimvwi mpoonya awo, kutola bweendelezi alubo. Cindi Leza akwaambila cintu cili coonse aa cibumbili eci, kwiinda ku Muuya Wakwe, cindi kungsi lya bunanike, uta zumbauzyi eco, nape cintu cibyaabi ciyo kulimba, Wa kaamba. Nkambo Jesu wakati, “I ciimo camamanino ca muntu oyo cakali ziindi zili ciloba bubyaabi kwiinda mbo cakabede ku busena butaanzi.” Sa mbo mbubo? Cindi muuya mubi wazwa mu muntu, wa keendenda mu masena mayumu, kajokela a badyabulosi bambi bali ciloba. Aboobo, uta unduluzyi. Kokkala ncobeni a Ndilyo. Ko cikanza, kuzwa ku moyo wako. Kwaamba, “Peepe, munene! Ta ndika zungaanisigwi! Takukwe makani obo Mbwe ciswa, eco ta cijisi cintu cakucita a ncico.” Mpawo, cintu citaanzi yebo ulizi, uyo talika kwaanguluka. Zintuzyonse ziyooaba kabotu mpawo. Wabona, calo cafwa. I—i kupandulwa oko dokotela nkwakali nocita ali nduwe, eco cikoto nciconya cili kkede muli nduwe, kakutakwe buumi muli ncico.

⁸⁸ Nywebo mwati, “Buumi muli ncico, Mukwesu Branham, sena ciyo tola buumi bwangu?” Peepe, munene. Obo buumi bwalo mbuumi bwandeene kuli bwako. Nda zwaa kukutondezya kuti uli buumi nkabela a kuba cilenge, nkabela acalo mbuumi a kuba cilenge; nkabela uli wa Leza, alimwi nca dyabulosi. Sa mwabona eco Nce pandulula? Zyamadaimona. Lino, weelede kubona cintu eco mbo ciboneka cindi waima a kucilanga.

⁸⁹ Oh, ma, Nda usa, catandila ku thirii-theeti. Nda usa. Amulange, beenzuma. Oh, eco inyika eyi ncoibulide!

⁹⁰ Ndi jisi myaka itandila ku ciloba, kuyiisya kwaandulula America, kuba a miswaangano eyi ya kuponya. Nda jisi buyo muzeezo mubotu wa kutalika kujoka kwaandulula cisi, kuyiisya Bbaibbele, alimwi ali zyamadaimona, obo bantu mbo bakonzya kumvwiya eco cakucita. Elyo ako nke kaambo, nco bainkila ku miswaangano eyi, bunji bwa ziindi, alimwi, mulombwana. . . . Ikuti na tomvwiya, bantu bala zwa, alimwi ziindi zinji. . . .

Lino, amuyeeye mulombwana ulya waka boola a kwaamba kuti wa ka jisi cipego ca kuponesegwa kwa Buleza? I cipego ca kuponesegwa kwa Buleza cakali muli nduwe ikuti na waka ponesegwa. Ndo nduwe, umwi. Kufumbwa cipego cibeleva kwiinda ku lusyomo. Elyo takukwe makani akunji kwa cipego cakuponesegwa kwa Buleza Nce jisi, Nda ci syoma a moyo wangu oonse, pele inga waima awa alimwi, kuti na tojisi musyobo nguwenya wa lusyomo, ta cikonzyi kukugwasya. Nda konzya ku kukumbela, kwa maora a mvwiki zinji a myeezi. Ta bali bakambausi ba jisi kuponesegwa kwa Buleza. Nduwe ojisi cipego cakuponesegwa kwa Buleza, oyo uusyoma mukuba aakuponesegwa, nkambo nkwiinda ku lusyomo. Kwiinda ku lusyomo! Kubeleva koonse kwa Leza nkwa ku lusyomo.

⁹¹ I zilwanyo zyoonse zya Leza nkwiinda ku lusyomo. Tatu jisi cintu comwe cakunyama ca inyika eyi. Zintuzyonse zya ii—ii zya mbungano ya Bunakristo mucito wa lusyomo. Langa ku cilwanyo ca Leza, luyandisyo, lukondo, luumuno, kukkazikamoyo, bubotu, lubombo, buuya, lukakatilo. Sa mbo mbubo? Zintuzyoonse nzya cigambyociinda, takukwe cakunyama. Aboobo ta tulangi ku zintu ezyi zyakunyama, nkaambo tu kutauka zya cigambyociinda. Elyo nzila biyo nje tukonzya kucisimpika, nja lusyomo, ali waawo Leza mpakati akali aa Bwini, alimwi tu langa kuli Zitabonwi. Elyo twiita zintu ezyo zyalo zitako, mbuli kuti zya kaliko; mbuli mbwa akacita Abrahamu, aku cijana. Ameni! Abrahamu wakaita zintu ezyo zya takaliko, mbuli Leza mbwa akacita, mbuli kuti zya kaliko. Mukuba a myaka ili mwaanda yakukomena, taka zungaana ku cisyomezyo ca Leza kwiinda ku kutasyoma.

⁹² Nda konzya buyo kuyeeyela boobo, sa inga tee mwacita? Kubona Sara kabuka cifumo cimwi. Leza wakati, “Abrahamu!” Kati, “Abrahamu, uyo oba a muvwanda.”

93 Sara kabuka. Kwaamba, “Ino ulimvwa buti, Sara?” Eyi ni nkamu isangene, pele amuswiilile.

“Taakwe lwandaano.”

94 “Ee, bulemu kuli Leza, tu yooba anguwe! Koya ukajane matebela a bapini, a zintuzyonse. Koli bambila.”

Yaa, mweezi umbi wakainda. “Sara, ulimvwa buti?”

“Taakwe lwandaano.”

Mwaka wakainda. “Sara, mbuti kujatikizya ncico?”

“Taakwe lwandaano.”

Myaka ili kkumi yakainda. “Taakwe lwandaano.”

Myaka ili makumi obilo ayosanwe yakainda. “Taakwe lwandaano.”

95 Abrahamu, mu cibaka cakuti kaya bukompama, wa kali kuya buyuma a kuyuma kapati. Wa ka lizi kuti ayoinde kuba maleele ciindi coonse, nkambo wa kasyoma Leza, nkabela taakwe na kazungaana ku cisyomezyo ca Leza kwiinda ku kutasyoma. Wa kati, “Tu yooba anguwe!” Elyo cifumo cimwi zyalilo lya Sara lya katalika kuzimba, nkabela Izaka muniini wakazyalwa, nkaambo Abrahamu wakasyoma Leza. Elyo wa kalanga ku zintu, a kulanganya zintu ezyo zyatakaliko mbuli kuti zya kaliko.

96 Kutali kwiinda ku kulimvwa, kutali kwiinda kukubona. Nywebo ta mweendi kwiinda ku kulimvwa a kukubona. Nkwa ku lusyomo. Elyo cindi Leza nakaamba cintu cili coonse, kati, “Kufumbwa zintu nzo mulomba, cindi mwakomba, amusyome kuti mwa zitambula,” elyo mpawo amujatilile kuli ncico. Leza wakaamba boobo, ceelede kuba boobo! Ameni. Madaimona!

Lusyomo muli Taata, lusyomo mu Mwana,
Lusyomo mu Muuya Uusalala, botatwe muli
Omwe;
Madaimona ayo kankama a basizibi
bayosinsimuka;
Lusyomo muli Jehova luyo zungaanya cili
coonse.

Mbo mbubo. Oh, ma! Ncobeni mbo cibede. Amube a lusyomo muli Leza. Amulange kuli Nguwe. Muta puti. Amu kkale mpoonya awo. Leza wakaamba boobo!

97 Elyo, madaimona, ino ali buti? Zilengwa zya kumuuya. Lino, i—i dokotela wati, “Ujisi kkulenge. Ujisi TB. Ujisi mancenga. Ujisi kuciswa kupati kwamucamba. Ujisi *ceeci*.” Ngu dyabulosi. Bwalo mbuumi, nkabela kunze lya buumi obo kuli muuya. Mbangaye bazi a kukonzya kubona kuti kkulenge, mancenga, ku jisi—ku jisi. . . Walo muuya, ujisi—ujisi buumi muli ncico. Ee, taakwe cikonzya kuba a buumi kakutakwe muuya,

nywebo mwabona, aboobo kweelede kuba buumi kukutauka ceeco, kumwi.

⁹⁸ Nekuba ulya musamu uli jisi buumi muli nguwo. Sayaansi yoonse mu inyika tai konzyi kupanga itu lyomwe lya bwizu. Sena mwa kalizi obo? Bala panga cintucimwi mbuli ndilyo, pele taba konzyi kujana nzila yakupanza buumi. Oyo ngu Leza. Mwabona? Jesu wakati ku musamu, “Wasi nganisigwa. To jisi mucelo nuuba omwe, alimwi tokabi aumwi pe.” Ba kaina kabajokela muni okuya. Ca kali cifumo eco cakali kutandila eiti okuloko. Ba kaina kabajokela kutandila ileveni okuloko, mbuli mbo bakali kwiinka kuyo susula. Petro wakati, “Langa kuli ulya musamu, wafwa kuzwa ku miyanda.” Nkaambonzi? Jesu waka tapatila buumi obo bwakali mu musamu ulya, obuya bwakali mu miyanda, nkabela cintu coonse cakafwa. Aleluya!

⁹⁹ Oyo Kristo nguwenya ula konzya kutapatila kkulenge kuzwa ku miyanda, nkabela cintu mbocizulwa cilafwa. Ulya musamu wakaliimwi okuya mbubonya buyo mbuli mbo wakabede, maoora kaa tanasika, pele mujana kuti matu akatalika kuloka, nkabela a kubona makwa katalika kukwamuka. Elyo ii... Katalika kukwamauka, buzuba a buzuba, alimwi mvwiki a mvwiki, nkabela nikwakaina kaindi tee kwakaliko cibeela comwe ca musamu oyo wakasyeede. Aleluya! Kkulenge, cikoto, mancenga, na kufumbwa cintu cimbi, ceeled kweenda cindi Kristo akanana. Wa ka tanda badyabulosi. Alimwi Wa kati, “Mu Zina Lyangu bayo tanda badyabulosi, kwaamba emilaka mipya, kujata nzoka, na kunywa zintu zijaya, tazi ka bacisi. Ikuti na babikka maanza abo a balwazi, bayo pona.”

¹⁰⁰ Mula Mu yanda? Nda usa Nda mujata kwa oora okuno masikati aya, kamukkede awa. Mula muyanda Mwami? [Mbunga yaamba, “Ameni.”—Mul.] Ncinzi ciyo citika lino? Ikuti na wa tambula Kristo mbuli musilisi wako, a kusyoma mu moyo wako kuti cintucimwi caku citikila, nkabela wa syoma kuteeti waponesegega, sa uyo syoma kuti waponesegega? Ta lekeli dyabulosi kubikka cintu cimbi ali nduwe. Ko zumanana buyo.

“Dokotela,” wati—wati, “dokotela, cili bonya buti?”

Wa kati, “Baa, nko cicili.”

¹⁰¹ Mu moyo wako ulizi, ulizi eco caka citika. Huh! Cintu citaanzi yebo ulizi, waamba, “Kati, ndalibuzya eco cakacitika ku cintu eco?”

¹⁰² Mpawo wati, “Langa, dokotela, Nda kwaambila. Nceeci cakacitika, Jesu Kristo waka ndiponya. Mbo mbubo. Jesu Kristo waka ndiponya.”

¹⁰³ Ncibotu, atu kotamike mitwe yesu aniini buyo. Mukwesu Willett, sa inga waboola okuno kwa kaina buyo kaniini, mukwesu?

¹⁰⁴ Lino, Taata Wakujulu, tuli lumbide nkambo ka Bulowa bwa Kristo. Elyo ambweni ziindizimwi kuti mulanda Wako, Mwami, ta belesyi busongo, kwiinda mu kukanana kulamfu loko. Pele ambweni Nda limvwa mbuli Paulo, oyo waka kambauka busiku boonse busiku bumwi. Ii mulombwana muniini wakawa kuzwa ku mpulungwido a kujaigwa. Mpawo ulya muapostolo, a Ijwi lya Leza mu buumi bwakwe, wakainka a kulazika mubili wakwe atala mulombe, buumi bwakaboola muli nguwe elyo waka pona alubo.


¹⁰⁵ Oyandwa Leza, Nda mvwisya kuti kubbila kwazuba kwa lusumpuko olu lupati lino kwabambwa, kwaainda kale kaindi, akati ka buzuba kwaainda, zimvule zya mangolezya ziya buvumbilila. Mumuni Mupati wapasuka kuzwa ku Bwami bwa Leza, kuti utole busena bwawo bwa mudima oyu usiya mbi uboola aa nyika. Leza, Nda mvwisya Ndiya bucembaala loko mazuba onse. Ndilekele ndiinke, Mwami. Ko ndipa nsana. Ko ndigwasya kwaamba Bwini obu bupati koonse. Ko tugwasya, juunza masikati, kuti tu kamvwisye kwiinda.

¹⁰⁶ Elyo, uyandwa Leza, longezya mbunga eyi nsyoonto masikati aya. Sunumasiku, cindi babungana mu muswaangano wa kuponya, akube kuti muntu a mwanakazi oonse asike kuli umwi aumwi a kunjila mu kukanana, a kwaamba, “Lino, nceeci . . . uta–uta cijisi limbi a kudonaika. Twa mvwisya oko nko cizwida lino. Tu lizi kuti ngu dyabulosi. Elyo tu lizi cindi nazwa, we elede kuboola ku kulailila kwa Leza. We elede kucita. Leza wa kaamba boobo. We elede kuzwa.” Mpawo, akube ba unke kumasena, kabakkomene, kabatangala, kabataminina kuponesegwa kwabo. Taakwecintu, talekeli cintu kubasinkila mu nzila yabo, limbi; kweenda buyo, kabasyoma.

¹⁰⁷ Elyo, Leza, akube kuti eyi mbungano niini awa, a mabungano aya abelekela antoomwe, abe a lubukulusy o kwamana muswaangano oyu, Mwami, olo luyo bazwidilizya kwobeni, alimwi myaanda minji ya bantu ikaletwe mu Bwami bwa Leza. Ko cipa, Taata. Akube kuti baalumi a banakazi awa, kuzwa ku masi oonse a masena ambi, akube kuti bajokelezye a Mulumbe ku mabungano abo, alimwi akube kuti babe a lubukulusy o lwa cianza cakale. Ko cipa, Mwami. Tujatile zibi zyesu eno. Tugwasye kuba balanda Bako. Mu Zina lya Jesu Kristo. Amen.

¹⁰⁸ Nda libuzya, kuciindi nomukkede awa, sa kuli sizibi mu buyake sunu, inga wati, “Mukwesu Branham, kondi yeeya mu mupailo”? Sena ula, sena ula tambika janza lyako? Sa kuli muntu sizibi? Nse ci . . . Leza aku longezye, mulindu. Sa kuli umwi? Leza aku longezye, munene. Yebo, a yebo, a yebo, Leza aku longezye. Nda libuzya ikuti na uli . . . Lino, eci cili kuli nduwe.

¹⁰⁹ Mwabona, Nse syomi mu kujokela mu bbunga lyabantu. Nse sampauli bamwi ba cicita. Nse syomi mu kwiinka mu bbunga

lyabantu a kusola kukwela umwi. Mwabona? “Taakwe muntu usika, cita Taata Walo ngwa kakwela.” Mwabona? Mbo mbubo. Uba kwela buyo kusika atala awa ku kulwana luyando lwakwe. Mwabona? Pele ikuti na Leza wakonkomona aa moyo wako, uli muntu sicoolwe maningi mu inyika. To zyi buyo mweelwe wa bantu Ngwe kakananina. 

ZYAMADAIMONA — CILAO CAKUNYAMA TNG53-0608A

(Demonology – Physical Realm)

MATOBELANWA AA ZYAMADAIMONA

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa mu Muvulo mangolezya, Gandapati 8, 1953, ku Roberts Park Amphitheater mu Connersville, Indiana, U.S.A., wakagusigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obu busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu ciyanza cakujokolosya, kusandululwa mu misyobo iimbi, na kubeleseghwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org